

ODBOJKAŠKI SAVEZ FEDERACIJE BOSNE I HERCEGOVINE  
VOLLEYBALL FEDERATION OF BOSNIA AND HERZEGOVINA  
-----Affiliated in FIVB-----

**P R A V I L N I K**  
**O DISCIPLINSKOJ I MATERIJALNOJ ODGOVORNOSTI**  
**ODBOJKAŠKOG SAVEZA FEDERACIJE BiH**

**Tuzla 08. 06.2026 god.**

**Na osnovu člana 50. Statuta Odbojkaškog saveza Federacije Bosne i Hercegovine  
Upravni odbor OS FBiH na sjednici održanoj 08.06.2026. godine donosi,**

**PRAVILNIK  
O DISCIPLINSKOJ I MATERIJALNOJ ODGOVORNOSTI  
ODBOJKAŠKOG SAVEZA FEDERACIJE BOSNE I HERCEGOVINE**

**I OSNOVNE ODREDBE**

*Član 1.*

Ovim Pravilnikom utvrđuje se disciplinska i materijalna odgovornost (u daljem tekstu: odgovornost) igrača, klubova i njihovih predstavnika, trenera i sudija, kao i disciplinski organi, postupak za utvrđivanje odgovornosti odbojkaških subjekata, vrste disciplinskih prekršaja, disciplinske kazne, postupak za izvršenje kazni, način vođenja evidencija o izrečenim kaznama, postupak po žalbi na izrečene kazne, rokovi za pokretanje postupaka, zastarjelost vođejna postupka i izvršenja kazni, uslovi i način suspenzije disciplinskih subjekata, način utvrđivanja materijalne odgovornosti, način naknade utvrđene štete, kao i druga pitanja vezana za odgovornost odbojkaških subjekata.

*Član 2.*

Ovaj Pravilnik se primjenjuje za sve odbojkaške subjekte, što znači da se primjenjuje na sve članice OS FBiH udružene Klubove i njihove predstavnike, igrače, sudije, trenere, odbojkaške organizacije i sl.

*Član 3.*

Odbojkaški subjekti iz člana 1. i 2. odgovorni su disciplinski i materijalno za nesavjesno izvršavanje svojih obaveza u skladu sa zakonima, Statutom OS FBiH, ovim Pravilnikom i drugim opštim aktima OS FBiH.

*Član 4.*

Krivična odgovornost, odgovornost za privredni prestup i prekršaj pred sudovima i drugim državnim organima ne isključuju odgovornost disciplinskih subjekata pred disciplinskim organima OS FBiH u skladu sa ovim Pravilnikom, ukoliko ponašanje po tim osnovama ima elemente odgovornosti u smislu ovog Pravilnika.

*Član 5.*

Odgovornost odbojkaških subjekata može se utvrđivati samo za one prekršaje koji su u vrijeme njihovog izvršenja bili kao disciplinski prekršaji utvrđeni ovim Pravilnikom ili drugim opštim aktima OS FBiH.

## **Član 6.**

Odbojkaški subjekt koji svojom krivicom ne ispunjava svoje obaveze ili se ne pridržava akata, odluka i propisanih mjera OS FBiH, čini disciplinski prekršaj u smislu ovog Pravilnika.

Odgovornost za disciplinski prekršaj postoji bez obzira da li je isti učinjen sa umišljajem ili iz nehata i da li je učinjen činjenjem ili nečinjenjem.

## **II DISCIPLINSKI ORGANI**

### **Član 7.**

Disciplinski organi OS FBiH su:

1. Disciplinski sudija OS FBiH
2. Upravni odbor OS FBiH.

### **Član 8.**

Disciplinskog sudiju OS FBiH imenuje Upravni odbor OS FBiH.

Disciplinski sudija OS FBiH mora imati VI ili VII stepen svih zanimanja.

## **III NADLEŽNOST**

### **Član 9.**

Disciplinski sudija OS FBiH rješava u prvom stepenu po prijavi za pokretanje disciplinskog postupka na svim takmičenjima koje organizuje i provodi OS FBiH.

Disciplinski sudija OS FBiH neposredno rješava i slučajeve koji nisu predviđeni drugim propisima, odnosno kada se ne može utvrditi nadležnost organa koji treba da postupi po nekom pitanju, a rješenje tog pitanja je u interesu odbojkaškog sporta.

### **Član 10.**

Upravni odbor OS FBiH rješava u drugom stepenu po žalbama odbojkaških subjekata na odluke Disciplinskog sudije OS FBiH.

Odluke Upravnog odbora OS FBiH su konačne.

## **IV DISCIPLINSKE KAZNE I DISCIPLINSKI PREKRŠAJI**

### **1) Disciplinske kazne**

### **Član 11.**

Disciplinske kazne koje se mogu izreći od strane disciplinskih organa su:

1. Novčana kazna u iznosu od 500 do 10.000 KM .
2. Zabrana nastupanja, ili vršenja funkcije na određenom broju utakmica i to od 1 do 12 utakmica , zabrana igranja utakmica bez prisustva gledalaca od 1-6 utakmica, i zabrana igranja od 1-6 utakmica udaljenosti od 60 km-minimalno od mjesta sjedišta Kluba.

3. Vremenska kazna zabrane nastupanja ili vršenja funkcije od 1 do 36 mjeseca,
4. Opomena i Javna opomena

### **Član 12.**

Disciplinske kazne: novčana kazna i zabrana nastupanja ili vršenja funkcije na određenom broju utakmica ili određenom vremenskom periodu se mogu izreći za bilo koji prekršaj utvrđen ovim Pravilnikom i bilo kom odbojkaškom subjektu.

### **Član 13.**

#### 2) Suspenzija

Suspenziju kao disciplinsku mjeru Disciplinski sudija može izreći za sve predviđene disciplinske prekršaje kada je izvršenje takvog prekršaja od strane nekog odbojkaškog subjekta izazvalo ili može izazvati teže posljedice po život ili zdravlje ljudi, ako takvo ponašanje ima elemente krivičnog djela ili može ostaviti teže posljedice na odbojkaški sport i odnose u OS FBiH. Suspenzija traje do 30 dana.

#### 3) Disciplinski prekršaji

### **Član 14.**

Disciplinski prekršaji predstavljaju sljedeća ponašanja odbojkaških subjekata:

1) Nesportsko ponašanje Klubova, igrača, članova stručnih štabova, predstavnika klubova, sudija i lica zaduženih ispred klubova za obavljanje tehničkih i redarskih poslova u dvoranama i to prije, za vrijeme ili nakon završetka utakmice prema drugom igraču, sudiji, gledaocima, zvaničnim licima ili drugim odbojkaškim subjektima, iskazano upućivanjem uvreda, psovki, kleveta ili upućivanje nepristojnih gestova; -do 10.000 KM.

2) Bacanje predmeta ili gađanje odbojkaških subjekata prije, za vrijeme i nakon završetka utakmice, od strane odbojkaških subjekata, gledalaca ili navijača Klubova, Psovke grupa -navijača gostujućim igračima službenim licima itd.-10.000 KM

3) Izazivanje nereda, tuče ili učešća u istom od strane odbojkaških subjekata.-do-6.000 KM.

4) Dolazak odbojkaških subjekata na utakmice ili učešće na njima pod uticajem alkohola ili drugih opojnih sredstava. do-7.000 KM.

5) Nepreduzimanje potrebnih mjera za organizaciju utakmica, usljed čega dođe do napada ili pokušaja napada na službena lica, igrače i sudije od strane gledalaca.do-6.000 KM.

6) Davanje lažnih podataka ili falsifikovanih službenih ili ličnih isprava prilikom registracije igrača, službenih lica i klubova ili prilikom nastupanja na utakmicama; Igrač koji ima važeći Ugovor sa Klubom a potpiše Pristupnicu ili Ugovor za drugi Klub biće kažnjen zabranom igranja do 1 godine i novčanom kaznom do 3000 KM a Klub za koga potpiše isti će biti kažnjen sa novčanom kaznom do 6000 KM a odgovorno lice u Klubu do 2500 KM.

7) Nastupanje klubova, igrača, trenera, članova stručnih štabova ili drugih službenih lica na javnim utakmicama za vrijeme u kojem im je izrečena kazna suspenzije ili zabrane nastupanja. do 8.000 KM.

8) Nastupanje za drugu ekipu i ekipu koja nije član saveza na javnim utakmicama igrača bez odobrenja kluba čiji je član biće pokrenut disciplinski postupak; Ukoliko igrač nastupi za drugi Klub bez odobrenja, matični Klub sprovodi disciplinski postupak i obavještava savez. Ako Klub nesprovede disciplinski postupak i neobavijesti savez o

sankciji onda savez pokreće disciplinski postupak protiv Kluba i igrača-ce, kazna donijeta nemože biti duža nego što igrač ima važeći Ugovor ovjeren u Savezu. Ako igrači-ice prijeđu u drugi savez odnosno OSRS bez dobijene saglasnosti protiv istih igrača-ica biće pokrenut disciplinski postupak i isti će biti sankcionisani .do 10.000 KM.

9) Nastupanje klubova na međunarodnim prijateljskim utakmicama u zemlji ili inostranstvu bez prethodnog odobrenja OS FBiH. do- 10.000 KM.

10) Nastupanje igrača koji su članovi domaćeg kluba za inostrani klub u zemlji ili inostranstvu bez prethodnog odobrenja OS FBiH. do-7.000 KM.

11) Nastupanje na prvenstvenim utakmicama pionirskih, kadetskih i juniorskih kategorija igrača i igračica koji su izgubili pravo da nastupaju prema godinama u tim kategorijama. do-7.000 KM.

12) Odbijanje nastupa za reprezentaciju u bilo kom rangu.do -8.000 KM.

13) Odbijanje dolaska na pripreme reprezentacije, neopravdano zakašnjanje na iste ili napuštanje priprema bez odobrenja. do -6.000 KM.

14) Nesavjesno, nemarno i neblagovremeno izvršavanje reprezentativnih obaveza.do-6.000 KM.

15) Neobavještanje u roku od 24 sata selektora ili OS FBiH o razlozima za nedolazak ili o razlozima zakašnjenja na utakmice ili pripreme reprezentacije. do-6.000 KM.

16) Nedolično i nesportsko ponašanje na utakmicama sa inostranim ekipama u zemlji ili inostranstvu kluba ili bilo kog odbojkaškog subjekta. do-6.000 KM.

17) Nedoovoljavanje kluba ili pravljenje smetnji da njegov član nastupa na utakmicama ili prisustvuje pripremama reprezentacije. do-5.000 KM.

18) Narušavanje ugleda OS FBiH ili zemlje na nastupima u međunarodnim takmičenjima.do -6.000 KM.

19) Ometanje Disciplinskog sudije u vođenju disciplinskog postupka izbjegavanjem prijema poziva, nedavanjem tražene izjave, nedostavljanjem dokaza, onemogućavanje utvrđivanja istine na različite načine, naručivanjem poziva svom članu od strane kluba preko kojeg mu je poziv poslat, vršenje pritiska na istog u cilju donošenja povoljnijeg rješenja u disciplinskom postupku i sl. do-8.000 KM.

20) Neizvršavanje konačnih novčanih kazni koje je izrekao Disciplinski sudija , Direktor takmičenja , Takmičarska komisija i Upravni odbor. do -5.000 KM.

21) Neplaćanje izrečenih troškova disciplinskog postupka od strane Disciplinskog sudije.do -2.000 KM.

22) Neizmirenje finansijskih obaveza prema OS FBiH. do – 2.000 KM.

23) Neizmirivanje finansijskih obaveza prema međunarodnim odbojkaškim organizacijama. Do-4.000 KM

24) Nedolazak ili zakašnjanje službenih lica delegiranih na utakmice.do -1.000 KM.

25) Nepodnošenje izvještaja službenih lica sa utakmica na vrijeme. do-1.000 KM.

26) Podnošenje netačnih izvještaja službenih lica sa utakmica. Do -1.000 KM.

27) Službena lica koja budu za isti dan obavljali dužnost na utakmicama Validne i Invalidne odbojke , čine prekršaj i protiv isti biće pokrenut disciplinski postupak te će isti biti kažnjeni do 2000 KM i zabranom vršenja na 5 utakmica u nadležnostima OSFBiH;

28) Prouzrokovanje materijalne šteteOSFBiH namjerno ili iz krajnje nepažnje.do-3000 KM

29) Odbijanje potrebne saradnje sa drugim odbojkaškim subjektima ili savezima kada je ta saradnja od značaja za odvijanje takmičenja ili je u interesu odbojkaškog sporta.do-3.000 KM.

30) Davanje netačnih izjava ili podataka čime se javnost putem medija,portala ili drugi odbojkaški subjekti obmanjuju o stanju, događajima ili ostvarivanju nekih prava vezanih za odbojkaški sport i OS FBiH, Zloupotreba tumačenja i pogrešne primjene akata OS FBiH od strane odbojkaških subjekata i pokušaj zavođenja pojedinih drugih odbojkaških subjekata kazniće se Klub čiji predstavnik radi takve poslove sa novčanom kaznom do 7.000 KM, a

osoba koja je to radila novčanom kaznom do 4000 KM i zabranom vršenja svih funkcija u odbojkaškom sportu u trajanju od 3 godine.

31) Neovlašćeno korišćenje stvari OS FBiH.do-4.000 KM.

32) Zloupotreba položaja ili prekoračenje ovlašćenja odbojkaških subjekata;

Ukoliko neko u Klubu potpiše neki akt a nije ovlašćena osoba, odnosno nije upisan kao osoba ovlašćena kod Ministarstva Pravde Kantona/Županije, protiv istog će se sprovesti disciplinski postupak kao i Kluba, te se kazniti Klub do 7.000,00 KM, osoba koja je akt potpisala do 3.000 KM i zabranom vršenja svih funkcija u odbojkaškom sportu 3 godine.

33) Odavanje službene i druge tajne utvrđene nekim od opštih akata OSFBiH.do-3000 KM.

34) Ometanje službenih lica u obavljanju njihovih funkcija na utakmicama za koje su delegirani, na putovanjima reprezentacije i sl.do-5.000 KM.

35) Nepodnošenje pismenih izvještaja Komisija koje je imenovala Skupština ili Upravni odbor saveza u roku od 15 dana poslije održanog sastanka, protiv predsjednika Komisije biće pokrenut disciplinski postupak po službenoj dužnosti.do-2.000 KM.

36) Iznošenje ili prenošenje nečeg neistinitog ili uvredljivog o drugom odbojkaškom subjektu ili OS FBiH. do-5.000 KM.

37) Odustajanje kluba od takmičenja poslije prijavljivanja ili u toku takmičenja u svim rangovima Premijer liga ,Super liga i Prva liga FBiH , Klub će biti kažnjen do 7.000 KM , članovi OSFBiH;

38) Zloupotreba namještanja rezultata, podmićivanje službenih lica uz dokaze, Klub će se kazniti sa novčanom kaznom od 10.000,00 KM, a ekipa će se kazniti preseljenjem u najniži rang takmičenja , a odgovorno lice u Klubu kazniće se sa 3.000,00 KM , i zabranom vršenja svih funkcija u odbojkaškom sportu u trajanju od 3 godine. Službena lica za koja se dokaže da su učestvovala u namještanju rezultata ili podmićivanju biće kažnjena sa 2.000 KM i doživotnom zabranom vršenja svih funkcija u odbojkaškom sportu .

39) Ugrožavanje regularnosti sistema stalnog takmičenja u okviru OS FBiH.do-5.000 KM.

40) Ukoliko igrač-ca budu registrovani u skladu sa aktima saveza u OSFBiH a posjeduju dvojno državljanstvo, nakon toga nastupe za neku drugu reprezentaciju bez predhodno odrađene procedure biće kažnjeni do 5.000 KM , Klub za koji su registrovani u OSFBiH takođe biće kažnjen do 10.000 KM, a o tome obavezno izvjestiti CEV. Takođe igrači-ce se kažnjavaju zabranom nastupa u domaćem prvenstvu do 12 mjeseci.

41) Ukoliko se Klub prijavi za takmičenje pa samovoljno istupi iz takmičenja, isti se seli u najniži rang takmičenja i isti mora platiti sve finansijske obaveze koje ga sleduju u tekućoj sezoni a zbog istupanja biće pokrenut disciplinski postupak po službenoj dužnosti i kažnjen novčano do 7.000 KM.Ako u istom Klubu postoji muška+ženska ekipa u sistemima takmičenja a prekršaj učini bilo koja ekipe, kazna je Klubu i neće se dozvoliti drugoj ekipi takmičenje dok Klub ne izvrši plaćanje novčanih obaveza za učinjeni prekršaj.

42) Svako fizičko i Pravno lice koje nanosi štetu i ugld Savezu , istupa u javnosti sa neistinama , obmanjuje javnost biće kažnjeno Pravno lice do 10.000 KM a fizičko lice do 3.000 KM. Ako lica kojima Skupština OSFBiH ili OSBIH izrekne opoziv a isti nepoštuju Odluku Skupštine ili zloupotrijebe položaj isti će biti kažnjeni do 10.000 KM ,zabranom vršenja funkcije do 3 godine a Klubu iz kojeg dolaze izrečena novčana kazna do 10.000 KM.

43) Protiv ekipa koje su prijavljene i žrijebane za završnice omladinskih takmičenja, a ne odigraju planirane utakmice iz bilo kojih razloga, automatski se pokreće disciplinski postupak.do-5.000 KM.

Disciplinski sudija za ovakve prekršaje izriče kaznu zabrane nastupa na federalnoj završnici određene omladinske kategorije tog kluba u narednoj sezoni (računajući samo one sezone kada je taj klub izborio plasman na federalnu završnicu) i novčanu kaznu u visini do 5.000 KM.

44) Protiv osobe koja je napredovala kao sl.lice mimo propisanih Pravilnika pokrenuće se disciplinski postupak a ista osoba koja je napredovala suprotno propisanim

Pravilnicima biće vraćena na listu za koju se ustanovi da joj pripada kao i kazniti se sa 1000 KM zbog šutnje i prihvatanja nepropisnog napredovanja.

45) Protiv ekipe koja odigra bilo koju utakmicu ili sa bilo kojom selekcijom protiv ekipe-a koje nisu članovi OSFBiH biće pokrenut disciplinski postupak i Klub će biti kažnjen do 8.000 KM a odgovorno lice do 4000 KM i zabrana vršenja svih funkcija u Odbojkaškom sportu do 1 godine.

46) Ako domaćin organizator utakmice iz bilo kojih razloga neodigra utakmicu biće kažnjen do 5.000 KM.

47) Ako Klub član OSFBiH organizuje domaći ili međunarodni turnir, dužan je obratiti se OSFBiH za delegiranje službenih lica. Ako postupi suprotno ovom stavu biće sankcionisan Klub do 5000 KM a odgovorno lice do 2000 KM.

48) Ukoliko Klub poslije bilo kojeg okončanog postupka u savezu i donijete Konačne Pravosnažne Odluke ili Rješenja pokrene postupak Van institucija OSFBiH isti će biti sankcionisan do 7000 KM.

49) Ukoliko Klub nedostavi igraču-ci, treneru-ici, Ugovor ovjeren od Registracione komisije sa dokazima o preuzimanju Ugovora isti će biti sankcionisan do 5.000 KM.

50) Ako Klub uputi nezakonit akt, koji nije propisan u aktima saveza, npr: nije uložena žalba na utakmici u zapisnik ili u roku od 48 sati nije uplaćena taksa na žalbu, a naknadno Klub uputio neki akt vezano za utakmicu, protiv Kluba koji se nezakonito obratio Savezu biće pokrenut Disciplinski postupak-neznanje ili nečitanje akata neoslobađa Klub i odgovornu osobu u Klubu odgovornosti.-Klub će biti sankcionisan do 5000 KM a odgovorno lice do 2.500 KM.

51) Ukoliko na utakmici predstavnik domaćina i gostujuće ekipe dođu bez pisanog dokaza da su službeni predstavnici isti će biti sankcionisani službeni predstavnik do 500 KM a Klub do 2000 KM.

52) Drugi prekršaji koji u sebi sadrže elemente prekršaja ili su predviđeni drugim opštim aktima OS FBiH.

- Sve kazne se uvećavaju za PDV.

## **V DISCIPLINSKI POSTUPAK**

### **1. Pokretanje postupka**

#### ***Član 15.***

Disciplinski postupak pokreće se prijavom Disciplinskom sudiji od strane odbojkaškog subjekta.

Prijavom se istovremeno ili posebno može pokrenuti i postupak za utvrđivanje materijalne odgovornosti nekog odbojkaškog subjekta.

#### ***Član 16.***

Prijava za pokretanje postupka sadrži:

- Naziv organa kojem se prijava upućuje;
- Ime i prezime pojedinca, odnosno naziv odbojkaškog subjekta i osnovne podatke o njemu;
- Vrijeme, mjesto, način izvršenja i opis disciplinskog prekršaja koji je učinjen, odnosno materijalne štete koja je učinjena;
- Dokaze (materijalne ili prikupljene izjave);
- Datum, ime i prezime i potpis podnosioca prijave za pokretanje postupka.

Prijava se podnosi Disciplinskom sudiji preko kancelarije OS FBiH.

## **2. Tok postupka**

### ***Član 17.***

Prijavu sa Rješenjem o pokretanju disciplinskog postupka, Disciplinski sudija odmah po prijemu dostavlja odbojkaškom subjektu na kojeg se ista odnosi, sa zahtjevom za pismeno izjašnjenje po navodima u istoj.

Rok za dostavu pismene izjave od strane odbojkaškog subjekta protiv koga je prijava podnesena je 3 dana, od dana prijema iste.

### ***Član 18.***

Dostave svih Rješenja i drugih pismena od strane disciplinskih organa odbojkaškom subjektu vrši se preko kluba čiji je on član. Kada Klub zaprimi pismeno dužan je isti dostaviti svojim članovima i obavijestiti iste o dostavljenom pismenu. Ukoliko odbojkaški subjekt koji je sankcionisan po Rješenju disciplinskog suca nepostupi po Rješenju isti se po automatizmu suspenduje. Datum kada je Rješenje ili drugi zahtjev dostavljen Klubu smatra se kao datum uručjenja istog odbojkaškom subjektu, te se odbojkaški subjekt kome je na ovaj način uručeno pismeno ne može pozivati da mu klub nije u roku dostavio isto.

### ***Član 19.***

Po pravilu disciplinski organi donose svoja Rješenja o izricanju kazne ili odbacivanju prijave, na osnovu disciplinske prijave, dostavljenih dokaza i dostavljene pismene izjave od strane odbojkaškog subjekta. Samo u komplikovanijim slučajevima gdje na osnovu navedenog u stavu 1. ovog člana, ne može utvrditi istinu, odnosno zauzeti stav, zakazaće se javna rasprava na koju će se pozvati lica od kojih se moraju neposredno prikupiti izjave ili drugi dokazi.

### ***Član 20.***

Ukoliko odbojkaški subjekt protiv koga je pokrenut disciplinski postupak ne dostavi u ostavljenom roku svoju pismenu izjavu na okolnosti navedene u prijavi, disciplinski organ će svoje Rješenje donijeti na osnovu dostavljene mu disciplinske prijave i drugih prikupljenih dokaza.

### ***Član 21.***

Poziv za eventualnu raspravu sadrži sljedeće:

- Naziv disciplinskog organa;
- Naziv odbojkaškog subjekta koji se poziva i u kom svojstvu;
- Opis disciplinskog prekršaja koji se određenom odbojkaškom subjektu stavlja na teret;
- Mjesto održavanja, dan i čas početka rasprave;
- Upozorenje da će se rasprava održati ako se izostanak unaprijed ne opravda.

### ***Član 22.***

U slučaju održavanja rasprave istom rukovodi Disciplinski sudija, odnosno predsjednik Upravnog odbora OS FBiH u drugom stepenu.

Poslije otvaranja rasprave utvrđuje se da li su sva lica pozvana na raspravu uredno i da li su se odazvali pozivu.

Rasprava se može održati i u odsustvu pojedinih lica koja su na nju pozvana ukoliko nisu opravdali svoj izostanak.

### **Član 23.**

Kada se utvrdi da su ispunjeni uslovi za održavanje rasprave, čita se prijava za pokretanje postupka, saslušavaju se pozvana lica i izvode se dokazi, odnosno sprovode se druge radnje za utvrđivanje činjeničkog stanja.

### **Član 24.**

U toku rasprave vodi se zapisnik u koji se unose svi podaci od značaja za donošenje Rješenja .

Kada Upravni odbor OS FBiH donosi Odluku posebno se vodi zapisnik o vijećanju i glasanju o Odluci.

### **Član 25.**

Po sprovedenom postupku disciplinski organ oglašava odbojkaškog subjekta krivim i odgovornim za učinjeni disciplinski prekršaj i izriče mu odgovarajuću kaznu ili obustavljanja postupak protiv istog.

Disciplinski sudija odlučuje RJEŠENJEM, a Upravni odbor OS FBiH ODLUKOM..

### **Član 26.**

Prilikom odlučivanja disciplinski organ nije vezan kvalifikacijom iz prijave o pokretanju postupka.

U Rješenju, odnosno Odluci se odlučuje i o troškovima postupka.

### **Član 27.**

Rješenje, odnosno Odluka se dostavlja odbojkaškom subjektu protiv kojeg je pokrenut disciplinski postupak, podnosiocu prijave, takmičarskom organu, klubu, odnosno organizaciji kojoj pripada i kancelariji OS FBiH.

## **3. Postupak po žalbi**

### **Član 28.**

Protiv Rješenja Disciplinskog sudije OS FBiH može se podnijeti žalba Upravnom odboru OS FBiH u roku od 3 dana od dana prijema Rješenja, uz uplatu takse od 600.00 KM+ PDV.

Žalba se ulaže preko kancelarije OS FBiH i dostavlja se Disciplinskom sudiji da kompletira dokumentaciju i eventualno sam izmijeni svoje Rješenje ukoliko procijeni da su razlozi u žalbi opravdani.

Po kompletiranju dokumentacije Disciplinski sudija OS FBiH odmah dostavlja sve spise predmeta Upravnom odboru OS FBiH na odlučivanje.

### **Član 29.**

Žalba zadržava izvršenje disciplinske kazne.

Ako na Rješenje Disciplinskog sudije OS FBiH žalbu podnese samo kažnjeni odbojkaški subjekt, drugostepeni organ mu ne može izreći težu kaznu od one koja mu je izrečena u prvom stepenu.

### **Član 30.**

Disciplinski organ obustavlja postupak po prijavi ili donosi oslobađajuće Rješenje u sledećim slučajevima:

- Ako radnja koja se okrivljenom stavlja na teret ne predstavlja disciplinski prekršaj;
- Ako postoje okolnosti koje isključuju odgovornost odbojkaškog subjekta;
- Ako se dokaže da odbojkaški subjekt nije učinio disciplinski prekršaj.

### **Član 31.**

Po žalbi se može donijeti jedna od sledećih Odluka:

- Odbaciti žalba kao neblagovremenu ili ako je podnijeta od nenadležnog lica;
- Odbiti žalbu kao neosnovanu i potvrditi prvostepeno rješenje;
- Usvojiti žalba, ukinuti prvostepeno rješenje i obustaviti disciplinski postupak;
- Ukinuti Rješenje i predmet vratiti prvostepenom organu na ponovno odlučivanje.

### **Član 32.**

Upravni odbor OS FBiH je dužan da u roku od 15 dana od dana prijema žalbe donese odgovarajuću Odluku po istoj.

### **Član 33.**

Ukoliko odbojkaški subjekt počini neki prekršaj dok mu kazna traje, Disciplinski sudac će po službenoj dužnosti provesti ponovni disciplinski postupak i donijeti novo Rješenje u roku od 15 dana od dana saznanja za počinjeni prekršaj.

## **4. Suspenzija**

### **Član 34.**

Suspenzija može biti automatska ili na osnovu Rješenja Disciplinskog sudije OS FBiH.

### **Član 35.**

Automatska suspenzija nastupa u slučaju kada je odbojkaški subjekt odstranjen sa utakmice i traje dok Disciplinski sudija ne izrekne odgovarajuću kaznu, a najduže mjesec dana.

Za automatsku suspenziju Disciplinski sudija OS FBiH nije dužan da donosi posebno Rješenje, već je delegat utakmice dužan da odstranjenom odbojkaškom subjektu tu činjenicu odmah nakon odstranjenja saopšti.

### **Član 36.**

Za vrijeme trajanja suspenzije odbojkaški subjekt ne smije nastupati na utakmicama, niti vršiti bilo koje funkcije u okviru nadležnosti OS FBiH.

#### **Član 37.**

Odbojkaški subjekt, može biti privremeno suspendovan Rješenjem Disciplinskog sudije OS FBiH i to najduže do okončanja postupka, ali ne duže od 30 dana.

#### **Član 38.**

Rješenje o suspenziji Disciplinski sudija dostavlja odbojkaškom subjektu u roku od 3 dana prijema prijave.

Predmeti u kojima je izrečena suspenzija su hitnog karaktera i moraju se rješavati u najkraćem mogućem roku.

O izrečenoj suspenziji izvještavaju se u roku od 3 dana nadležni takmičarski organi i organizacije čiji je član odbojkaški subjekt.

#### **Član 39.**

Suspenzija prestaje donošenjem Rješenja Disciplinskog sudije OS FBiH.

Na Rješenje Disciplinskog sudije o suspenziji, odbojkaški subjekt kome je izrečena suspenzija ima pravo žalbe predsjedniku Upravnog odbora OS FBiH u roku od 24 časa a Predsjednik Upravnog odbora u roku od 48 časova odlučiti o njenoj osnovanosti i naložiti Disciplinskom sudiji da preispita svoje Rješenje ukoliko smatra da je isto neosnovano izrečeno, obrazloženje o razlozima za takvo mišljenje.

Disciplinski sudija OS FBiH može, a ne mora da izmijeni svoju Rješenje u kom slučaju suspendovani odbojkaški subjekt ima pravo da uloži žalbu nakon izrečene kazne od Disciplinskog sudije OS FBiH, Upravnom odboru OS FBiH na izrečenu kaznu .

Ukoliko odbojkaškom subjektu od strane Disciplinskog sudije OS FBiH bude izrečena vremenska kazna ili kazna zabrane igranja ili bavljenja funkcijom, u istu se uračunava vrijeme provedeno pod suspenzijom.

## **VI MATERIJALNA ODGOVORNOST**

#### **Član 40.**

Odbojkaški subjekti odgovorni su za materijalnu štetu koju naprave svojim disciplinskim prekršajem i dužni su da tu štetu nadoknade OS FBiH.

Ako štetu prouzrokuje više odbojkaških subjekata, svaki od njih je odgovoran za dio štete koju je prouzrokovao.

Ako ne može da se utvrdi pojedinačna odgovornost i udio, štetu nadoknađuju u jednakim dijelovima.

#### **Član 41.**

O materijalnoj šteti odlučuje disciplinski organ koji vodi disciplinski postupak.

U postupku se utvrđuje:

- Postojanje štete;
- Okolnosti pod kojima je ona nastala;
- Visina štete;
- Ime i prezime, odnosno naziv odbojkaškog subjekta, koji je počinio štetu;
- Visina paušalnog iznosa štete, ako se ne može utvrditi njen tačan iznos.

Visina štete utvrđuje se na osnovu tržišne vrijednosti nove stvari ili u novčanom iznosu.

#### ***Član 42.***

Sve odredbe koje se odnose na utvrđivanje disciplinske odgovornosti i izricanje kazni, shodno se primjenjuju i kod materijalne odgovornosti.

### **VII TROŠKOVI POSTUPKA**

#### ***Član 43.***

Troškovi disciplinskog postupka predstavljaju troškove koji su neophodni da bi se postupak sproveo i koji u sebi sadrže materijalne troškove izrade i dostave Rješenja i dokaza i paušalne naknade za utrošeno vrijeme zaposlenih u OS FBiH i disciplinskih organa.

#### ***Član 44.***

Troškovi postupka se utvrđuju u paušalnom iznosu od 10% od izrečene novčane kazne, odnosno u iznosu od **100 do 500 KM** + PDV za izrečene kazne zabrane igranja, obavljanja funkcije i vremenske kazne.

#### ***Član 45.***

Prihod od troškova postupka pripada OS FBiH.

### **VIII IZVRŠENJE IZREČENIH MJERA**

#### ***Član 46.***

Izrečene disciplinske mjere se izvršavaju nakon što je Rješenje Disciplinskog sudije postalo konačno, odnosno odluka Upravnog odbora OS FBiH konačna.

#### ***Član 47.***

Novčana kazna se izvršava tako što se kažnjenom odbojkaškom subjektu ostavlja rok od 8 dana od dana uručenja konačne odluke da na račun OS FBiH uplati izrečeni iznos novčane kazne i troškova postupka.

U slučaju da odbojkaški subjekt u ostavljenom roku ne izvrši navedenu kaznu, ista se izvršava tako što nastupa automatska suspenzija odbojkaškog subjekta do izvršenja izrečene mjere.

O neizvršenju izrečenih kazni brine kancelarija OS FBiH, koja o istom obavještava takmičarski organ, nedležni savez i Upravni odbor OS FBiH

## **IX PONAVLJANJE DISCIPLINSKOG POSTUPKA**

### ***Član 48.***

Okončani disciplinski postupak pred disciplinskim organima OS FBiH se ne može ponavljati, ali se protiv lica koja su lažno svjedočila ili dostavljala falsifikovane isprave i dokaze u okončanom disciplinskom postupku može pokrenuti disciplinski postupak prijavom oštećenog odbojkaškog subjekta i to u roku od 30 dana od dana saznanja za postojanje navedenih činjenica, a sve to u objektivnom roku od godinu dana od dana konačnosti disciplinskog rješenja o kojem je riječ.

## **X VANREDNO UBLAŽAVANJE KAZNE**

### ***Član 49.***

Izuzetno, kada postoje nesumnjivi dokazi da je Rješenje disciplinskog organa sa kažnjavajem postigla svoju svrhu, Upravni odbor OS FBiH na prijedlog kažnjenog odbojkaškog subjekta može donijeti Odluku o ublažavanju ili oslobađanju daljeg izvršenja kazne.

## **XI ZASTARJELOST U DISCIPLINSKOM POSTUPKU**

### ***Član 50.***

Disciplinski postupak se ne može pokrenuti ni voditi po isteku od 6(šest) mjeseci od dana saznanja za učinjeni disciplinski prekršaj učinioaca, odnosno u roku od 12(dvanaest) mjeseci od dana učinjenog prekršaja.

## **XII PRELAZNE I ZAVRŠNE ODREDBE**

### ***Član 51.***

Slučajeve, koji nisu predviđeni ovim Pravilnikom, rješavaće Upravni odbor OS FBiH.

### ***Član 52.***

Disciplinski pravilnici regionalnih saveza, organizacija, udruženja i klubova, ne mogu biti u suprotnosti sa ovim Pravilnikom.

### ***Član 53.***

***Tumačenje ovog pravilnika daje Upravni odbor OSFBiH.***

### ***Član 54.***

Ovaj Pravilnik stupa na snagu danom donošenja. Stupanjem na snagu ovog Pravilnika stavlja se van snage Pravilnik broj: 2231-09/25 od 08.09.2025. godine

Broj: 2397-06/26

Tuzla, 08.06.2026. godine

**P R E D S J E D N I K**

---

Fatić Alija dipl. pravnik